

Naalakkersuisut utoqqaat pillugit periusissiaq pillugu nassuiaataat

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Saqqummiussisut

(Ilaqutariinnermut, Kultureqarnermut, Ilageeqarnermut Naligiissitaanermullu Naalakkersuisoq)

Naalakkersuisut sinnerlugit matumuuna Naalakkersuisut utoqqaat pillugit periusissiaq pillugu nassuiaataat saqqummiutissavara.

Naalakkersuisut utoqqaat pillugit periusissiaq manna aqutugalugu inuiaqatigiinni ineriartortitseqqinnissamik utoqqarnut iluaqutaasussamik tunaartarisassaliortut. Naalakkersuisut takorloorpaat utoqqaat namminneq aalajangiisinnaassuseq akisussaaqataanerlu aqutigalugit pitsaasumik inuuneqarnissaat, inuiaqatigiillu utoqqaat ataqqinassusilimmik inuunissaannut pisariaqartumik isumassuinissamik neqerooruteqarnissaat.

Siunissami innuttaasut katitigaanermikkut nikikkiartornerisa takutippaat ukioqatigiiaat nikeriassasut, utoqqaat malunnaatilimmik amerleriartussaallutik, inuilli sulisinnaasut taama annertutigisumik amerleriassanatik. Taamanna pissutigalugu pisortat utoqqarnut aningaasartuuteqarnerusalissapput. Utoqqaat pillugit periusissiaq manna aqutigalugu Naalakkersuisut unamminartoq tamanna iliuseqarfigaat.

Utoqqaat pillugit periusissiami innuttaasut aningaasaqarnermut, peqqissutsimut, najugaqarnermut, sunngiffimmi soqutigisanut, nuunnialersaarnermut inuunermillu naammagisimaarinninnerannut kissaataat pillugit misissuineq HS ANALYSE-mit ingerlanneqarsimasoq ilanngunneqarpoq. Misissuineq taanna tunngavigalugu erserpoq, innuttaasut 2001-imut naleqqiullugu aningaasaqarnerminnik inuunerminnillu ataatsimut isigalugu naammagisimaarinninnerulersimasut. Ineriartorneq tamanna pitsaasuvoq, ilaatigut pissutigalugu, inuunermik naammagisimaarinnittutut misigisimaneq, inuunerup pitsaassuunissaanik qularnaareqataasarmat. Misissuinermi paasisat utoqqaat pillugit periusissiamut matumunnga ilanngussatut kakkigunneqarput.

Inuttut nammineq akisussaanissaq soraarnerussutisiaqarnissamullu nammineq akileeqataanissaq, utoqqaat pillugit periusissiami qulequtaapput pingaaruteqartut. Innuttaasut utoqqalinissaminnut namminneerlutik ileqqaaruteqarnissaat tamatumani Naalakkersuisut inassutigaa. Ilaatigut inassutigineqarpoq misissorneqassasoq inuussutissarsiortut tamarmik utoqqalinersiassaminnut pinngitsooratik ileqqaaruteqarnissaannut periarfissat suunersut, aamma inuussutissarsiortunut tamanut tunngatillugu kingusinnerusukkut soraarinnigortarnissamut kajumissaataasinnaasut siunnersuutigineqarput.

Utoqqarnik isumassuineq pillugu qulequttap ataani nalerarineqartut ilagaat angerlarsimaffimmi ikiorteqartarnerup annertusarneqarnissaa, taamaasiornikkut sapinngisamik sivisunerpaamik utoqqaat imminnut napatinnissaat anguniarlugu. Kisiannili Naalakkersuisut utoqqaat sivisunerpaamik angerlarsimaffiminiinnissaat

anguniaraluarpassulluunniit, piffissaq takkukkumaarpoq utoqqaat imminnut imaluunniit ilaqtaminnit ulluinnarni isumassorneqarsinnaajunnaarlutillu paaqqutarineqarsinnaajunnaarnerat. Taamaattumik utoqqarnut inissiat naammattut utoqqaat kissaataannut pisariaqartitaannullu naapertuuttut pigineqassapput.

Utoqqaat pillugit periusissiap naggataani puigortunngorneq pillugu qulequtaq ilanngunneqarpoq. Nunatsinni ukioqqortuneruleriartornerput pissutigalugu inuit taamatut nappaatillit amerliartortussaapput, puigortunngorneq utoqqarni takussaannerusarmat. Puigortunngornermut tunngatillugu pilersaarut maanna suliarineqarpoq, taassumallu UPA 2013-imi saqqummiunneqarnissaa pilersaarutiginneqarpoq. Taanna piareerpat immikkut ittumik nappaammut tassunga katsorsaatissatut neqeroorutini tikkuussinissaq naatsorsuutigineqassaaq.

Naalackersuisut kissaatigaat utoqqaat inuunerminni misilittagaasa piginnaasaa salu inuiaqatigiinni iluaqtiginneqarnissaat. Kalaallit kulturiata qangaaniilli ilaqtariinni pingaartitat ilaqtariissutsikkut annertuumik ataqtigiiffiusut attatuarsimavai – tamatumalu ingerlaannarnissaa qularnaartariaqarpoq. Qangaaniilli pingaartitat oqaatsittalu ataavarnissaannut aamma qanga pisut, ullumikkut pisut siunissallu imminnut ataqtigiissinissaannut utoqqaat isumalluutaapput.

Eqqaaneqassaaq periusissiaq tassaammat piffissaq ungasinnerusoq eqqarsaatigalugu pilersaarut angusaqarfiusussaq. Periusissiani killiffimmiit killiffimmut allamut qanoq nikeriarnissaq allaaserineqartarpoq. Naalackersuisut Akileraartarnermut Atugarissaarnermullu Ataatsimiititaliap isumaliutissiissutaani isumaliutissiissutillu malitseqartinnissaa pillugu nassuiaammi inassuteqaatit aallaavigaat. Aammattaaq Naalackersuisut innuttaasut oqariartuutaat misissuineq qulaani pineqartoq aqutigalugu ilaatippaat.

Periusissiap inuiaqatigiinni unamminartut pingaarnerusutigut isummerfigisarpai. Tamatuma nassataraa utoqqaat pillugit periusissiami, unamminartut taakku iliuuseqarfiginissaannut ilusiliunneqarsinnaasut tikkuarneqarmata. Tamatuma kingorna Inatsisartut aalajangiiffigissavaat, ilusiliunneqarsinnaasut arlaat suna ingerlateqqinneqassanersoq. Imaappoq utoqqaat pillugit periusissiap imarivai pingaarnerusutigut nalerarineqarsinnaasut.

Suliap ingerlaqqinnerani, annermillu isumassuinermit tunngasuni, soorunami kommunit peqqinnissaqarfilla qanimut suleqatiginneqassapput, tamannalumi kapitali 5-imut eqikkaanermi aamma eqqaaneqarpoq. Kommunit tassaapput isumassuinermit neqeroorutini atuisunut qaninnerpaat, peqqinnissaqarfilla tassaavoq angerlarsimaffinni peqqissutsikkut isumassuinermit peqqissutsimullu tunngasunik tamanik annertuumik ilisimasaqartoq, taakkulu utoqqarnut pingaaruteqartuupput.

Taamatut oqaaseqarlunga qanoq isiorluta utoqqaat inuiaqatigiinni peqataallutik nalituumillu inuuneqarnissaat qulakkeerniarlugu oqallinnissaq qilanaaraara.